

दिनांक 01.09.2025

समय: 18.45 बजे

- विधानसभा रा पावस सत्र री हंगामा सागे सरूआत— भारी शोरगुल बीचे पख—विपख रा सदस्य एक दूजा माथे आरोप लगाया।
- प्रधानमंत्री नरेन्द्र मोदी री रूस रा राष्ट्रपति ब्लादिमीर पुतिन सागे मुलाकात— विश्व शांति सारू आपसी मदद माथे ज़ोर दीनो।
- राज्य रा 22 ज़िलां मांय हाल ताई चौमासा री असामान्य बारिश—17 ज़िलां मांय सामान्य ऊं बत्तो मेह बरस्यो।
- प्रदेश रा नगरीय निकायां री गळियां मांय लाइटां री तादाद बधा र दो लाख करी जावेला।

000

राज्य री मौजूदा विधानसभा रो चौथो सत्र आज सरू व्ह्यो। इण री सरूआत भारी हंगामा अर पख—विपख रा सदस्यां कानी ऊं एक—दूजा माथे आरोप लगावण सागे व्ही। विधानसभा अध्यक्ष वासुदेव देवनानी विपख रा सदस्यां कानी ऊं करी ज्या शोर—शराबा माथे नाराज़गी जताता थकां कह्यो के सदन रो मान बणायो राख्यो जावणो चाहिजे।

सदन मांय विपख रा नेता टीकाराम जूली सत्ता पख माथे लोकसभा अर विधानसभा चुनाव मांय वोट चोरी रो आरोप मांड्यो अर तख्तियां लहराई। खबरनवीसां सागे बातचीत करता थकां श्री जूली कह्यो के सदन मांय विपख री आवाज़ दबायी जा रही है।

संसदीय कार्यमंत्री जोगाराम पटेल खबरनवीसां सागे बातचीत करता थकां विपख रा रवैया री निंदा कीनी अर कह्यो के विपख रा सदस्य सदन री मर्यादा भंग कीनी है।

हंगामा बीचे ही जीएसटी द्वितीय संशोधन बिल 2025, राजस्थान कारखाना संशोधन बिल, 2025 अर राजस्थान स्वास्थ्य विज्ञान विश्वविद्यालय अध्यादेश 2025 सदन सामी पेश करी ज्या। ई रे अलावा राजस्थान कोचिंग सेंटर नियंत्रण अर विनियमन बिल 2025 ओजू सदन मांय पेश करी ज्यो। ओ बिल लारला सत्र मांय पेश करी ज्यो हो, जिण ने प्रवर समिति ने भेज दियो ज्यो हो। चौथा सत्र रा पहला दिन लारला दिनां देवलोक व्हा खास लोगां, आतंकी हमला, विमान हादसा अर कुदरती आपदावां रे कारण मरण वाळां ने मौन राख र सिरधाभाव सागे याद करी ज्या। ई पाछे विधानसभा री कार्रवाई बुधवार ताई टाल दीरीजी।

000

प्रधानमंत्री नरेन्द्र मोदी अर रूस रा राष्ट्रपति ब्लादिमीर पुतिन बीचे आज बातचीत व्ही, जिण मांय माली अर ऊर्जा समेत न्यारा—न्यारा हलकां मांय एक—दूजा री मदद रा बारा मांय चर्चा करीजी। दोन्यू नेता शंघाई सहयोग संगठन शिखर सम्मेलन पाछे चीन रा तियानज़िन मांय मिल्या। प्रधानमंत्री मोदी कह्यो के भारत अर रूस हमेशा एक—दूजा सागे रह्या। वे कह्यो के दुनिया मांय शांति, थरता अर खुशहाली सारू दोन्यू देशां बीचे बेहतर रिश्ता घणा जरूरी है।

000

राजस्थान लोक सेवा आयोग री सदस्य मंजू शर्मा इस्तीफो दे दीनो है। आज राज्यपाल हरिभाऊ बागडे ने भेजी ज्या कागद मांय वे सार्वजनिक जीवन मांय साफ़गोई अर शुचिता रो हवालो दीनो। ई बीचे राजस्थान हाईकोर्ट एसआई भर्ती पेपरलीक मामला मांय पकड़ी ज्या आरपीएससी रा पैली वाळा सदस्य रामू राम राइका समेत 23 आरोपितां ने ज़मानत दे दीनी, जद के 29 आरोपितां री ज़मानत अर्जी खारिज कर दीरीजी।

000

प्रदेश रा 22 ज़िलां मांय हाल ताई असामान्य बारिश दर्ज करी ज्यी है, जद के 17 ज़िलां मांय सामान्य ऊं बत्ती बरसात व्ही है। जल संसाधन विभाग री ओर ऊं जारी आंकड़ां रे मुजब एक जून ऊं आज ताई केवल बाड़मेर अर सलूम्बर मांय सामान्य बरसात व्ही है। चोखा मेह रे पाण प्रदेश रा तळावां—बंधां मांय ऊं करीब 85 फीसदी भर ग्या है। ई बीचे, आज ई सीकर, अजमेर, बांसवाड़ा, बारां, पाली, चूरू अर सवाईमाधोपुर समेत कई ठौड़ां बरसात व्हेवण रा समाचार है, जिण ऊं कई जगहां नदी—नाळा मांय पाणी उफण रह्यो है। सीकर मांय व्ही झमाझम बिरखा ऊं जिन्दगी माथे घणो असर पड़्यो। जयपुर रा गांवाई हलकां नरैना, दूदू, सांभर अर फुलेरा मांय लगातार व्हे रही तेज़ बारिश ऊं नीचला हलकां मांय पाणी भर ग्यो। समाचार मांड्या

जावण री बगत जयपुर शहर मांय ई झमाझम मेह बरस रह्यो हो। बांसवाड़ा जिला मांय छड़ी-बीछड़ी बिरखा व्ही। माही बंधा रा आठ दरुजा खोल र बत्तो पाणी निकाळ्यो जा रह्यो है।

प्रतापगढ़ जिला मांय जाखम बंधा ऊं ई बत्तो पाणी निकाळ्यो जा रह्यो है। बारां मांय ई आखा दिन रुक-रुक र बरसात व्हेवण रा समाचार है। चूरू मांय ई बिरखा रो पाणी निकाळबा रा पुख्ता प्रबंध करी ज्या है। भारी बारिश ऊं कुशलगढ़ हलका रा खेरिया पाड़ा तळाव री पाळ टूट जावण रो अंदेशो है। सवाईमाधोपुर जिला रा 18 मांय ऊं 16 बंधां माथे चादर चाल रही है। अजमेर जिला मांय श्रीनगर रा बालद का दड़ा तळाव मांय करीब 50 साल पाछे ई साल चादर चाली। आना सागर अर वरुण सागर झील मांय ई तेजी ऊं पाणी आ रह्यो है। सिरोही जिला रो बनास बंधां माथे ई रपट चाल रही है। पाली रा गजनाई अर कंटालिया बांध माथे रपट चालण ऊं सवराड़ अर सुकड़ी नदियां मांय पाणी उफण रह्यो है। खतरा ने ध्यान राखता थकां प्रशासन सोजत-सिरियारी स्टेट हाईवे अर बगड़ी गेलो बंद कर दीनो है। जवाई बांध मांय लगातार पाणी आ रह्यो है। ई बीचे राज्य मांय घणखर ठौड़ा आवता दिनां चोखी बिरखा व्हेवण रा आसार है। मौसम विभाग आज अलवर, झुंझुनूं, खैरथल-तिजारा अर कोटपूतली-बहरोड़ मांय भारी बरसात रो ऑरेंज अलर्ट जारी कीनो है, जद के 29 जिलां सारु येलो अलर्ट जारी करी ज्यो है। मौसम केन्द्र जयपुर रा निदेशक राधेश्याम शर्मा बतायो के राज्य मांय सितम्बर महीना मांय सामान्य अर सामान्य ऊं बत्ती बारिश व्हेवण री संभावना है।

000

प्रदेश रा नगरीय हलकां री गळियां मांय लाइटां री तादाद एक लाख ऊं बधा र दो लाख करी जावेला। मुख्यमंत्री भजनलाल शर्मा री सदरत मांय व्ही मंत्रिमण्डल री मीटिंग मांय ओ फैसलो करी ज्यो। मुख्यमंत्री ओ काम दीवाळी ऊं पैली सरू करण रा हुकम दीना। स्वायत्त शासन विभाग रा सचिव रवि जैन बतायो के राज्य रा 312 नगरीय निकायां मांय बेहतर प्रकाश व्यवस्था जरूरी है। ई सारू जूनी अर कमजोर लाइटां री ठोड़ नुवी एलईडी लगायी जावेला। वे बतायो के 15 सितम्बर ऊं 2 अक्टूबर ताई **शहर चलो अभियान** चलायो जावेला।

000

डीग जिला रा कुम्हेर मांय कृषि विज्ञान केन्द्र री ओर ऊं सहजन रा चार हजार पौधा तैयार करया जा रह्या है। दवाई रा गुणां अर पोषक तत्वां ऊं भरपूर अ पौधा गांव वाळां ने बांट्या जा रह्या है। म्हाणी खबरनवीस बतायो के लोगां ने इण रा फायदा बताता थकां खान-पान मांय शामिल करण री सीख दी जा रही है।

000

गोगा नवमी रे मौके आज गोगाजी मन्दिरां मांय खास सजावट करीजी अर केई ठोड़ां भक्ति संध्या राख्यी जा रही है। तेजा दशमी अर लोकदेवता रामदेव जयंती काल मनाई जावेला। ई सिलसिला मांय आज नागौर जिला मांय तेजाजी री जन्मस्थली खरनाल मांय दो दिन रो मेळो सरू व्ह्यो। खास मेळो काल भरेला। ब्यावर मांय ई आज वीर तेजा मेळो सरू व्ह्यो। पाली मांय तेजाजी री शोभायात्रा निकाळी ज्यी। राज्यपाल हरिभाऊ बागडे आज जैसलमेर रा रामदेवरा मांय बाबा रामदेव री समाधि रा दर्शन कर र जनता री सुख-समृद्धि री कामना कीनी। मुख्यमंत्री भजनलाल शर्मा रामदेव जयंती अर तेजा दशमी री बधाई अर शुभकामनावां देता थकां कह्यो के अ लोक देवता जनता रा भला सारू ज़िन्दगी लगा दीनी।

000